

**Najib Terima Kunjungan Presiden Kosovo
Bernama
7 Jun, 2013**

PUTRAJAYA, 7 Jun (Bernama) -- Perdana Menteri Datuk Seri Najib Tun Razak hari ini menerima kunjungan Presiden Kosovo, Atifete Jahjaga di Bangunan Perdana Putra di sini.

Presiden Jahjaga dan delegasi tiba di perkarangan bangunan itu pada kira-kira 5 petang serta disambut oleh Najib di pejabat beliau.

Mereka kemudian mengadakan pertemuan selama sejam yang antara lain bertujuan meningkatkan hubungan dua hala antara Malaysia dan republik itu.

Presiden Kosovo itu berada di negara ini sempena Sidang Kemuncak Global Wanita 2013 (GSW) yang bermula semalam dan berakhir esok.

Semalam, Presiden Jahjaga dan delegasi turut menghadap Yang di-Pertuan Agong Tuanku Abdul Halim Mu'adzam Shah di Istana Negara di Kuala Lumpur.

Malaysia secara rasmi menjalin hubungan diplomatik dengan Kosovo mulai 18 Mac 2011 selepas republik itu mengisytiharkan kemerdekaannya daripada Serbia pada 17 Feb 2008.

Malaysia kemudian mengiktiraf kemerdekaan republik itu pada 30 Okt tahun yang sama dan sehingga April 2012, hanya Malaysia dan Brunei antara negara Asean yang memberi pengiktirafan tersebut.

Sidang Kemuncak Global Wanita 2013 bertemakan "Wanita: Mewujudkan Ekonomi Baharu" berlangsung selama tiga hari di Kuala Lumpur adalah perhimpunan tahunan yang menemukan pemimpin wanita terkemuka dalam kerajaan dan perniagaan dari lebih 70 buah negara.

Malaysia selaku tuan rumah berhasrat untuk menyediakan platform bagi meneroka strategi praktikal dan amalan terbaik dalam memajukan peluang ekonomi wanita di seluruh dunia.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=954711>